

671.1117
085
16

三河縣新志

傅增湘
書



三河縣新志卷之四

文獻志

人物篇上

昌黎有云燕趙古稱多慷慨悲歌之士又云安知今必異於古所云也以三河論官文恭公與曾文正同時入相功蓋天下嚴範蓀先生爲當今嚴子陵名高天下官生於夏莊嚴生於段家嶺與趙文恪公之父墓田相望同孕育於盤山之靈此數公者皆非慷慨悲歌所得盡之也昔採訪至大康莊有野老指五龍灣上游二水相合處謂係明初康茂才之墓大康莊數百戶皆其子孫舊有族譜經兵燹後遺失無存惜無能力考究之今即乾嘉以來確實可考者凡仕績孝友德行節義儒林文苑皆代

不乏人皆分別立傳以著鄉型以存國粹續志人物上

仕績

趙煜宗城內東街人號潤堂行三三河縣拔貢生由四庫館膳錄議叙州判揀發雲南補礮嘉州州判升保山縣知縣歷署易門大姚祿豐等縣知縣子堃侍雲南在保山縣署生孫光即文恪公潤堂卒於官葬雲南北郊蓮花池上孫光應考入昆明縣學籍聯捷入翰林屢放河南江南浙江等省提督學政仕至刑部尙書在任逾二十年卒諡文恪清國史有傳

王官文字秀峯三河夏莊人由武科進士充御前侍衛仕至兵部尙書湖廣總督武英殿大學士封一等果威伯爵世襲罔替同治髮逆之役與曾文正胡文忠李文忠等勳績相伯仲曾文

正公稱其大度虛懷荐賢滿天下卒諡文恭准在原籍及立功省分建立專祠清國史有傳

王廷獻夏塾鎮人道光甲午科武舉丙申進士殿試二甲第一名恩賞三等侍衛由門上行走當差期滿以遊擊補用於道光二十一年四月內奉旨揀發廣西以遊擊委用歷署提標中軍參將左江鎮中軍遊擊及桂林城守營遊擊各印務嗣于二十三年六月內題補廣西提標左營遊擊又于二十六年經總督耆奏題補提標中軍參將復經總督徐給咨送部并委伴越南國使臣進京于二十八年十一月十二日兵部帶領引見奉旨准其補授廣西提標中軍參將嗣于二十九年回省經總督扎委陞署新太協副將于十二月奉派管帶官兵赴西延等處督

勦楚匪三十年二月初八日由龍勝奉撤回營于三月初八日奉派赴雒容中渡等處督勦至四月初五日由羅錦永福奉撤回營又于四月十二日奉派星夜馳赴西延并湖南新寧等處會勦五月初七日軍務告竣由鹽井凱撤回營又于七月二十一日奉派馳赴修仁荔浦一帶會勦沿途追賊至運江接仗身先士卒屢著戰功因夜間追襲賊匪戰馬跌倒將兩腿壓傷不能動轉稟請回省調養至九月初七日夜間衙門附近失火燃燒房室恐有奸細負痛親起彈壓撲救雖云回省調治奈軍務吃緊晝夜不敢偷安是以腿傷不能就痊中心焦灼飲食俱廢延至十五日亥時棄世長子武生王鎬隨任哀痛迫切昏憤之餘勉強扶柩回籍竟未能將伊父被傷身故情形詳細聲明稟

請提憲代爲轉奏以邀恩恤迄今恨恨查王公素行豪爽勇藝絕倫雖身膺武職處世溫和故里黨之中咸思慕焉

佈克慎本邑城內滿洲正白旗人於道光十八年由防禦提補察漢俄博營都司到任後調署秦州遊擊於二十三年統帶陝甘督標兵勇勦捕番賊接伏數次親自殺賊數名經督憲以忠勇可嘉專摺保奏蒙恩賞戴花翎提升陝甘督標後營遊擊歷護莊浪協副將經陝甘總督林調護中軍副將又帶兵征勦黑錯寺蒙陝甘總督保舉以參將儘先升用奉部推升督標左營參將二十七年喀什哈爾逆回作亂隨同甘陝總督佈帶兵征勦凱撤後因管帶認真軍務可靠專摺保奏以永固協副將升補蒙恩允准引見後仍回陝甘中軍任事經總督琦委署榆林

鎮總兵於咸豐元年進京引見奉旨回任候升是年九月補授
貴州威寧鎮總兵進京謝恩召見四次奉旨即速赴任於二年
五月初六日到威寧任十一日奉雲貴總督吳奏署古州鎮總
兵帶兵在廣西交界防堵奉文調補右江鎮總兵賊匪竄擾湖
南貴州兵往勦賊匪敗退經兩湖總督吳調往北洪山紮營在
吳城鄱陽湖防堵於八月初七日奉旨補授貴州提督四年正
月調赴黃州與賊接仗殺傷多名逆匪繞道攻撲營盤帶兵趕
救又殺賊無數以致左腿被賊矛傷因而失利自行檢舉雖奉
旨革職仍令隨同兩湖總督帶兵征勦二月賊佔黃陂城池親
自帶兵攻打自辰至未殺賊四五百名生擒二十餘名被水淹
死者無數遂收復黃陂城池三月十一日奉旨署理湖北提督

在楊店賊撲大營追勦二十餘里殺賊無數大獲勝仗會商兩湖總督楊駐紮瀘口賊由漢州一帶而來曾欽使與塔軍門從湖南分路夾攻於九月克復武昌後同塔軍門兩路夾攻殺賊多名奪獲器械無數燒燬賊營二座十月初九日奉旨發往江西差遣委用因抵江省派往吳城會同九江道恩防勦將賊擊退遂與九江道馳赴九江大營接應楚軍數月以來帶傷接仗屢獲全勝染患痰症右邊手足麻木兼之矛傷發作以致不能動履後經塔軍門驗明病勢與矛傷具咨撫院轉奏蒙恩准其回旗調理歸旗後趕緊醫治猶冀傷病兼痊効死疆域乃日復一日病不見痊傷益增劇因而逝世跡其平日自述自從戎以來接仗數十次每遇勁敵即大聲疾呼謂兵弁曰一人捨命萬

夫難當以故所向克捷勇氣倍加不意一朝失利壯志莫酬是
吾恨也迄今緬懷梗概追溯遺言猶覺忠義凜然大節無虧當
咸豐同治時省局舊志京旗駐防各旗人物事實皆不具載嗣
奉欽定八旗通志臚舉賅備始得具此梗概現值民國時代本
邑有此功烈顯揚之士尤不能聽其湮沒故列入續修縣志人
物中以示不忘云

劉永安號固山定福莊人清乾隆丙午科舉人應大挑一等以
知縣用籤分貴州試署普安正安貴筑等州縣調補貞豐州知
州嗣以運銅被議降三級調用擬解組歸同僚爲之捐復原官
仍歸原省補用先是赴任時曾請家訓其父連佐公告以訟獄
者居官之首要培陰功滅天理均在於此一人興訟數農失時

一案既成十家蕩產豈細故哉汝其勉旃永安秉承義訓刻骨銘心在官秉公人不敢干以私均以白臉包目之卒以剛直有觸上峯被黜歸家傳曰子之能仕父教之忠永安有焉

崔景嵐字海峯邑城內人幼讀書稍長精武術十七歲時投通永練軍考試正兵未幾擢升哨長光緒十六年直邊奸民結黨號金鋼道殘殺蒙民蒙民告急通永練軍暨武衛軍奉調前往勘平景嵐率健兒前導身先士卒無堅不破是時深蒙樂統領及聶統領嘉賞亂甫平即聯銜保升中營左哨哨官十七年奉調彈壓東北鑛區二十一年經鑛務大臣張翼保充營官並統帶馬步礮等隊二十七年經兩江總督南洋大臣張翼保充衛隊五營統領並加二品銜賞戴花翎旋補江甯鎮總兵到任未

久張翼被劾同時辭職復回東北金鑛區原任總理一百二十餘局在鑛區二十餘年自遷安至內蒙金塲溝梁面積一千二百餘里恩威並用民皆樂從匪皆遠避除保護治安外兼理民事一時口碑載道婦孺皆知至今居民猶樂道之三十二年鑛區結束偕眷返里各鎮居民無以爲報曾公送萬民旂二面萬民傘二柄萬民感戴匾額一方至今懸掛後經兩江總督張人駿湖廣總督張之洞屢次招聘均以親老辭焉卒於民國二十三年六月年七十四歲

吳士珍字聘之保定省立師範畢業考入陸軍軍官學校分發贛省吉安步兵第一旅充陸軍候補生期滿赴保定入軍官學校第八期第三隊步兵科肄業十一年期滿畢業由陸軍部令

分發江蘇陸軍第十九師歷充排連長十三年蒙國民軍第三軍兼直隸督辦孫岳委充保定防務司令部主任參謀調充保定城內南區警察署長十四年冬季投効國民第一軍第二路總指揮部暫編第一師韓復榘麾下充少校參謀十五年轉進南口十七年張褚殘軍過三河縣境張冠五軍編特務營長駐密雲縣又聘爲該軍教育長十八年春在西苑第四集團軍白崇禧部軍官教育團充上校隊長同年秋季又充北平憲兵第二營營長兼憲兵學校深造班隊長十九年冬投効山東第三路軍總指揮部參謀處現充中校參謀兼省府檢定縣長訓練班主任廿三年七月赴江西廬山受訓於軍官訓練團期滿卒業

吳謙字棟雲三十四歲北平求實中學畢業清和陸軍中學畢業保定陸軍軍官學校第九期騎兵科畢業曾在山西趙承綬部充當騎兵團中校團附及騎兵團長之職現充山東第四路民團指揮部少校參謀職

吳士賢五福莊人由監生保升知縣民初充總統府醫官四等嘉禾章江蘇候補道尹

楊開甲字仲仙南寺頭人清光緒二十二年由武童投効督辦東征處効力嗣因迭次擒獲巨匪歷保副將銜補用參將民國元年充公府武承宣司司長五年奉策令加陸軍少將銜七年經湖南督軍張電調襄辦軍務補授陸軍少將給予二等文虎章八年給予二等大綬嘉禾章十一月由湖南請假歸奉令仍

回侍從武官本職十三年奉令加陸軍中將銜充京師警察廳勤務督察長十四年奉令授爲陸軍中將十五年調充本廳消防處長是年奉令授爲將軍府將軍計在職三十餘年奉公守法成績維昭此固由個人黽勉從事寔亦賢母楊艾氏義方之訓得力爲多也

劉殿元字臚卿沙嶺村人前清由守備遞升參將四郊遊擊大隊統帶賞戴花翎二品頂戴歷充察哈爾鹽務署幫辦第十三師高級參議民國六年晉敘陸軍少將晉授三等文虎章嘉禾章及教育部一等金色獎章辦理京營東郊南郊地方公益教育各事收東西郊潰兵商民均愛戴不置云

蔡增祿號受之三邑城內旗籍人曾充驍騎枝清末被選爲第

一區區董兼審核會會長有猷有爲凡地方興利除弊之舉公
首先提議全會爲之贊同以是邑人士樂與之遊私事亦咸取
決焉五旬餘卒於職李家棗林鄉長雷殿卿等公輓一聯云廿
年來服務粉鄉民資保障官藉扶持到處頌鴻功怎却他八等
嘉禾萬名衣傘一日間脫離塵世母泣倚閭兒悲陟岵無緣驅
虎疫竟亡我一區正董三邑完人觀此一聯雖善善從長亦可
見生平之梗概矣

德行

郝玉衡字窺璣沙嶺村人庠生郝舜琴之次子天資超邁秉性
溫良好善樂施克承先志以淑身濟物救苦周貧爲己責生平
無吝容亦無德色其尤著者乾隆辛巳歲旱癸未春飢發困頓

篋煮米施粥躬親散給捨葯施衣力行不怠此二年間鄉人賴以全活者不可勝計乾隆二十七年顯親王賜溫厚可風匾額學憲廉得其實書額檄縣旌之以勸風俗增生梁廷琯里人陳宗堯等公立善行碑銘以頌之崇祀鄉賢祠傳載畿輔通志誥贈奉政大夫其子瑞麟字仁圃居家孝友處世仁慈施粥施衣施棺施葯家有成局其及身推廣者於村西設義學以教童子於杜家莊買高田以通道路於大新莊建浮橋以便行旅於周家莊南捐地以葬異鄉人皆爲創舉至今猶利賴焉有以吉凶事來告者莫不量爲周助嘉慶辛酉歲大潦歉收竭力濟貧貸錢施散通永道勞樹棠目擊其事服其向義之勇欲言之大京兆奏請旌獎辭以誼切桑梓非敢邀名屢却乃止邑城大成殿

年久漏缺竭資重修謂子侄孫輩入爨序者衆此事何敢請之
他人遂引爲己任數月告成故其身雖未通仕籍而仰承天語
垂訓疊邀高宗純皇帝八旬萬壽獻詩冊祝嘏蒙恩加一級嘉
慶元年躬與千叟宴蒙賞御製詩如意荷包鳩杖等件八年睿
皇帝臨幸盤山率子孫跪迎聖駕上遣人詢問年歲並問隨叩
者是汝何人一一奏對誠爲曠典自天潢卿貳制府宗師郡縣
時有匾額詩章之賜乾隆五十六年戶部侍郎兼順天府府尹
蔣公順天府府尹汪公書額檄縣旌表曰怡庭淑世以勸風化
嘉慶二年刑部侍郎兼順天府府尹張公書匾額曰近光風世
嘉慶十九年制軍那宮保顏其堂曰善人之室壽至八十二終
遺愛流芳至今人思慕之